

ՎԵՐԱՊԱՏՐԱՍՏՈՂ ԿԱԶՄԱԿԵՐՊՈՒԹՅՈՒՆ՝

ԼԵՈՅԻ ԱՆՎԱՆ ՀԱՄԱՐ 65 ԱՎԱԳ ԴՊՐՈՑ

ՎԵՐԱՊԱՏՐԱՍՏՎՈՂ ՈՒՍՈՒՑՉԻ

ՀԵՏԱԶՈՏԱԿԱՆ ԱՇԽԱՏԱՆՔ

Հետազոտության թեման՝ «Մասնա ծոեր» էպոսի գաղափարը. ուսուցման
խնդիրները հանրակրթական դպրոցում

Հետազոտող ուսուցիչ՝ Մարիամ Սարգսյան

Ալ. Մյասնիկյանի անվան համար 66 հիմնական դպրոց

Մենթոր ուսուցիչ՝ Անահիտ Զոհրաբյան

Երևան 2022

ԲՈՎԱՆԴԱԿՈՒԹՅՈՒՆ

Ներածություն	3.
Գլուխ 1.	5.
Գլուխ 2 .	12.
Եզրակացություն	13.
Օգտագործված գրականության ցանկ	14.

ՆԵՐԱԾՈՒԹՅՈՒՆ

Աշակերտը ոչ թե սափոր է, որ պետք է լցնել
գիտելիքներով, այլ ջահ է, որ պետք է վառել...
Մարկոս Քվինթիլիանոս

Կրթությունը մարդու և արտաքին աշխարհի հարմարեցման լավագույն միջոցն է: 21-րդ դարի ուսուցիչը կանգնած է լուրջ մարտահրավերների առաջ: Աշխարհի գերզարգացման այս թռիչքի ժամանակներում ուսուցչի հետազոտական աշխատանքի նպատակը արդյունավետ մեթոդական մշակումներ անելն է: Ուսուցման գործընթացը հիմնված է ուսուցչի և սովորողների համատեղ գործունեության վրա, որի ընթացքում իրականացվում է կրթություն, դաստիարակություն, անձի զարգացում: Արդի մանկավարժական որոնումների նպատակն է ուսուցման գործընթացը դարձնել այնպիսին, որ սովորողների պասիվ ունկնդրի դերը փոփոխվի ակտիվ մասնակցի դերով: Արդյունքում սովորողները դառնում են առավել անկաշկանդ և ինքնուրույն, նրանց մոտ ձևավորվում են ճանաչողական հետաքրքրություններ ու կարողություններ:

Հայոց լեզվի և գրականության ուսուցչի նպատակն է սովորողի մեջ խթանել ինքնուրույն կարծիք ձևավորելու, հստակ դիրքորոշում ունենալու և հիմնավորելու, տեղեկատվական իրարամերժ ազդեցություններից զերծ մնալու կարողունակությունը: Արդյունքում սովորողները պետք է կարողանան բազմակողմանի դիտարկել ուսումնական նյութը, լուծումներ առաջարկել, այս կամ այն մտքի հետ համաձայնել կամ չհամաձայնել՝ հստակ հիմնավորելով իրենց տեսակետը:

Հետազոտության թեման է «Մասնա ծոեր» էպոսի դասավանդման մեթոդները 9-րդ դասարանում: Արդի չափորոշչային պահանջներով առավել շեշտադրված է էպոսի ազգային- հայրենասիրական գաղափարը: Մինչդեռ բազմադարյա մեր վիպերգը խիստ բազմաշերտ է՝ անհատից մինչև համամարդկային խնդիրներ: Պատահական չէ, որ մեր էպոսը 2012 թվականին ընդգրկվեց ՅՈՒՆԵՍԿՕ-ի Մարդկության ոչ նյութական մշակութային ժառանգության ներկայացուցչական ցանկում:

Էպոսի դասավանդման նպատակներն են.

Սովորողը պետք է իմանա՝

- ինչ է դյուցազներգությունը,
- դյուցազներգության՝ որպես գրական տեսակի առանձնահատկությունները,
- դյուցազներգության բովանդակությունը, գաղափարը:

Վերջնարդյունքներն են.

Աշակերտը պետք է կարողանա՝

- քացատրել՝ ինչու է էպոսը համարվում ազգային վեպ,
- ներկայացնել ժողովրդական բանահյուսության ստեղծած հոգևոր հարստությունները, դյուցազներգության անցած ճանապարհը մինչև մեր օրերը, ասացողներին, էպոսի մշակողներին,
- բնութագրել հերոսներին և մեկնաբանել նրանց արարքները,
- կատարել հերոսների բնավորության և արարքների բազմակողմանի քննություն, գուգահեռներ տանել այսօրվա հետ,
- ձևավորել ազգային-հայրենասիրական սթափ գաղափարներ. պատմությունից դասեր քաղելու, ազգային թերություններն ու առավելությունները հստակ տեսնելու կարողություն,
- էպոսն ընկալել ոչ թե որպես երկդարյա իրադարձություններ արտացոլող պատում, այլ որպես հայկյան ցեղի հետ սկիզբ առած վիպերգ, որ այսօր էլ շարունակում է հյուսվել
- հստակ պատկերացնել պետության կարևորությունը, քաղաքական մտածելակերպ ձեռք բերել, ունենալ ոչ թե ենթարկվողի, այլ իշխողի տրամաբանություն ,
- արժևորել դյուցազներգության գաղափարները,
- գտնել ազգային ինքնաճանաչողության բանալիները,

Խաչվող հասկացություններ՝

- ժամանակ և տարածություն,
- սեփական պետության արժևորում:

ԳԼՈՒԽ 1.

«Սասնա ծռերի» դասավանդման ընթացքում կիրառվում են հետևյալ մեթոդները.

- համեմատական-գուգադրական մեթոդը՝ օգտվելով նաև տարբեր հեղինակների գրական մշակումներից,
- զրույցը, քանի որ ակնկալվում են թեմատիկ որոշ շեղումներ,
- բանավեճը՝ քննական մտածելակերպ և լուծումներ գտնելու կարողունակության զարգացման համար:

Սովորողները անդրադառնում են ժողովրդական բանահյուսության ճյուղերին, ապա դիտարկվում է էպոսը՝ որպես բանահյուսական նմուշ, էպոսի՝ որպես ազգային բնավորության, պատմության, հոգեբանության, ազգային արժեքները գնահատելու, պահպանելու, անցյալի դասերը վերլուծելու, գաղտնագրերի էությունը հասկանալու, հերոսականության գաղափարները:

Անդրադարձ է կատարվում էպոսի բովանդակությունը: «Սասնա ծռերը» ընդունված է դիտարկել որպես 8-10-րդ դարերի հերոսավեպ, երբ հայ ժողովուրդն ազատագրական պայքար էր մղում Արաբական խալիֆայության դեմ, բայց սա խիստ միակողմանի մոտեցում է: «Սասնա ծռերը» կրում է բարձրակարգ համաժամանակյա գաղափարներ: Դյուցազներգությունն առհասարակ հնարավոր չէ թվագրել, ինչպես թվագրվում է պատմությունը: Ժողովրդական մեր հերոսավեպը սկսել է հյուսվել հայ ժողովրդի ծագումից ի վեր, ունի շուրջ 2900 տարվա անցած ճանապարհ, բայց գրի է առնվել և գիտությանը հայտնի դարձել միայն 19-րդ դարի 2-րդ կեսից: 1873 թվականին բանահավաք Գարեգին Սրվանձոյանը Արևմտյան Հայաստանի Մուշ գավառի Առնիստ գյուղում Կրպո անունով մի բանասացից լսում և գրի է առնում հերոսավեպը, իսկ 1874 թվականին նա Կոստանդնուպոլսում առանձին գրքով տպագրում է՝ «Գրոց ու բրոց և Սասունցի Դավիթ կամ Մհերի դուռ» խորագրով¹:

Մինչ Սրվանձոյանի հայտնագործությունը էպոսի մասին տեղեկություններ են հայտնել 16-րդ դարում պորտուգալացի ճանապարհորդներ Անտոնիո Տենրեյրոն և Մեստրե Աֆոնսոն, որոնք Արևելքում ճամփորդելիս եղել էին նաև Հայաստանում, իսկ Սասունում տեղացի հայերից լսել են զանազան զրույցներ Դավթի և Խանդութի մասին, բայց տեղեկությունները կցկտուր ու թռուցիկ էին: 1886 թվականին Մանուկ Աբեղյանը Նախո Քեռի անունով մի մոկացուց գրի է առնում էպոսի 2-րդ պատումը և տպագրում՝ «Դավիթ և Մհեր» խորագրով: Որոշումները շարունակվում են տարբեր բանահավաքների կողմից և մի քանի տասնամյակի ընթացքում պսակվում մեծ հաջողությամբ: Հայաստանի տարբեր գավառներից գրի է առնվում էպոսի շուրջ 160 տարբերակ:

Դյուցազներգությունը բերանից բերան պատմում էին սովորական

¹ «Սասունցի Դավիթ» / Լույս հր. 1981/ Ս. Հարությունյան, Շ. Կոչոյան էջ 3

ժողովրդական մարդիկ, որոնց անվանում են **ասացող**: Բազմաթիվ ասացողների անուններ են մեզ հասել: Նրանք մարդկանց հավաքում էին իրենց օդաներում և բանավոր պատմում, փոխանցում դյուցազներգության իրենց տարբերակը: Ամենահայտնիներից են Նախո Քեռու և Խապոյենց Ջաղիկի օդաները/հավաքատեղիները/: Էպոսի որոշ հատվածներ պատմելիս ասացողները հաճախ նույնիսկ արտասովել են, ինչը վկայում է, թե որքան են նրանք արժևորել էպոսը՝ որպես հայ ժողովրդին խորհրդանշող ու բնութագրող ամբողջություն: Կան վկայություններ, որ նույնիսկ օրերով մարդիկ հավաքված լսել են էպոսի պատումները՝ առանց ելումուտի և քար լռությամբ:

Շուրջ 60 պատումների հիման վրա էպոսի համահավաք բնագիրը լույս տեսավ 1939 թվականին՝ «Սասունցի Դավիթ» վերնագրով՝ Մ. Աբեղյանի, Գ. Աբովի և Ա. Ղանալանյանի մշակմամբ/ խմբագիր՝ Հովսեփ Օրբելի/ :

Պատումները հասել են ամենատարբեր բարբառներով, հատկանշական է, որ թեև էպոսի հիմքում Սասունն է նշվում, բարց ամենաքիչը հենց Սասնա բարբառով պատումներն են: Պետք է ասել, որ տարբեր գավառների պատումների բովանդակությունը երբեմն կտրուկ տարբեր է եղել: Կան պատումներ, որոնցում բացակայել է Սանասարի և Բաղդասարի մասին ճյուղը, որոշ պատումներում չի հիշատակվում նաև Մեծ Միերը, բայց Դավթի մասին շեշտադրված պատմվում է պատումների բոլոր տարբերակներում: «Սասնա ծոերը» տոհմաձառ է՝ 4 սերնդով, հայերս այդ նույն տոհմաձառի ճյուղերն ենք, որ ժառանգաբար կրում ենք Սասնա դյուցազուններին բնորոշ դրական և բացասական հատկանիշները: Սասնա տունը պատումներում կոչվել է Մեծ տուն, ինչը խորհրդանշել է հայոց պետականության մոդելը: Էպոսի 4 ճյուղերին անդրադառնում ենք առանձին-առանձին: Յուրաքանչյուր ճյուղն ուսումնասիրելուց հետո սովորողները գնահատում են գաղափարը, հետևություններ անում, գնահատում հերոսներին: Բացի էպոսի առանցքային հերոսներից հատուկ ուշադրության են արժանացնում նաև մնացած կերպարներին:

Ուսուցման նպատակներիս վերջնարդյունքն ապահովելու համար յուրաքանչյուր ճյուղի բովանդակությունն ուսումնասիրության ավարտին սովորողներին տրվում է համահավաքում չընդգրկված, բայց տարբեր բանահավաքների և ուսումնասիրողների կողմից հայտնաբերված տարբերակներ, վարկածներ և մեկնաբանություններ:

«Սանասար և Բաղդասար» ճյուղն անցնելիս բովանդակությունից բացի սովորողը պիտի կարողանա գնահատել Սանասարի առաքելությունը՝ պետություն հիմնելու: Պետք է նշել, որ էպոսի բազմաթիվ պատումներում Սանասարն ու Բաղդասարը ոչ թե ջրից են ծնվել, ինչպես համահավաք բնագրում է ասվում, այլ ծնվել են Բաղդադի Խալիֆի և Ծովինարի ամուսնությունից: Բաղդադի Խալիֆը հնագույն ժամանակներից հայտնի Սենեքերիմ թագավորն է/ Խորենացուց հայտնի/:

Ամուսնության շարժառիթը սերը չէր, այլ ուներ զուտ քաղաքական կայունություն ասպահովելու նպատակ: Ծովինարը Հայաստանի Գազիկ թագավորի դուստրն էր, իսկ Հայաստանը հարկատու էր Մսրա երկրին, որը ոչ թե Արաբական խալիֆայությունն է, այլ հին Եգիպտոսը:

Մանասարը բնույթով առաջնորդ է / ինչպես Հայկ Նահապետը/, նա չի ընդունում հնագանդությունը: Երկու եղբայր դուրս են գալիս Խալիֆի երկրից, փնտրում ու հայտնաբերում են լեռնային մի երկիր, այնտեղ կառուցում են իրենց քաղաքն ու բերդը, բնակեցնում, հիմնադրում են «Մասնա Ջոջանց տունը»²: Մանասարն ու Բաղդասարը Մասնա դյուցազնական տոհմի նախնիներն են՝ պետության և տոհմի հիմնադիրը: Մասնա տունը խորհրդանշում է հայրենիքը: Բաղդասարից սերունդ չի շարունակվում: Մասնա դյուցազնական տոհմը շարունակվում է Մանասարի ժառանգներից՝ Մեծ Մհեր, Ձենով Հովան, Վերգո:

Անդրադառնում ենք «Մեծ Մհեր» ճյուղին: Երեք եղբայրներից հոր դյուցազնական հատկանիշները ժառանգում է Մհերը: Մասնա տան իշխանությունը նրան է անցնում: Մեծ Մհերը շենացնում է երկիրը, ազատում այն մեծ Մսրա Մելիքի հարկադրումից, պատերազմում է Սասունի անկախությանը սպառնացող Մսրա Մելիքի դեմ, Սասունը դարձնում անկախ ու հզոր: Մհերի քաջությունն ու դյուցազնական ուժը երևում է նաև առյուծին մեջտեղից կիսելու՝ ձևելու տեսարանից: Առյուծը խորհրդանշում է երկրի անվտանգությանն ու բարեկեցությանը սպառնացող թշնամիներին:

Հարկ է անդրադառնալ նաև էպոսում արտացոլվող հեթանոսական սովորույթներին: Մհերը, ըստ ազգագրագետ-բանահավաքների որոշ մասի, խորհրդանշել է արևի աստված Միհրին /Միթրային/, որը պատկերվում էր շեկ առյուծի գլխով: Դյուցազնի՝ Առյուծաձև Մհեր անվանումը նաև այս վարկածով է մեկնաբանվում: Հեթանոսական ավանդույթով է մեկնաբանվում նաև Մեծ Մհերի 7 տարով Սասունը լքելն ու Մսրքում հաստատվելը: Երբ Մսրա Մելիքը եկել է Սասուն՝ հարկ հավաքելու, Հովանն ու Վերգոն փորձել են Մհերին «սովորեցնել» որոշ դիվանագիտական հմտություններ՝ Մելիքին մեծարելու և բարյացակամությունը շահելու: Մհերն իրեն պահել է դյուցազունին հարիր՝ անտեսելով եղբայրների խորհուրդները: «Սասնո երկիրը մերն է, իմ զարմից Մանասարն ու Բաղդասարն են շինել», - ասել է նա:³ Մելիքն առաջարկել է կովել: Ամբողջ մի օր նրանք մենամարտել են, նրանցից ոչ մեկը մյուսին չի հաղթել: Մհերն ապացուցել է առաջնորդ լինելու իր իրավունքը: Մելիքն ու Մհերը բարեկամանում են՝ որպես տարբեր երկրների հավասար ուժերով և իրավունքներով օժտված առաջնորդներ: Մելիքի հետ Մսրք քաղաքից եկած տասը ծերունիների առաջ, ըստ հեթանոսական սովորույթի, Մսրա Մելիքն ու Մեծ Մհերը եղբայրության ծիսական երդումով արարողակարգ են

² «Սասունցի Դավիթ», Ս. Հարությունյան, Հ. Կոչոյան, «Լույս» հր., 1981, էջ 6:

կատարում: Նրանք իրար երդվում են, որ իրենցից որևէ մեկի վաղաժամ կյանքից հեռանալու դեպքում մյուսը պարտավորվում է մեռած եղբոր կնոջ ամուսինը դառնալ, վերցնել թագավորությունը, որպեսզի մեռնողի երկիրը չկործանվի և անժառանգ չմնա: Հաջորդ տարի Մեծ Սարա Մելիքը մահանում է: Միերը, համաձայն իրենց երդումին, պարտավորվում է թողնել Սասնա իշխանությունը եղբայրներին և գնալ Մսրը: Եթե Միերը հետ կանգնեի վկաների առաջ տրված իր խոստումից, ապա Մսրից կգային ուխտին մասնակից տասը վկա ծերունիները Սասուն և քաղաքային հրապարակում կպատմեին Միերի երդմնազանցության մասին: Այնինչ Միերը Սասունին դեռ ժառանգ չէր պարգևել: Միերի կինը՝ Արմաղանը, ամուսնուն հետ պահելու անպտուղ փորձերից հետո զգուշացնում է նրան, որ Սասնա տան ժառանգներին արգելված է երկու բան՝ սուտ երդվելը և այլազգի կանանց հետ խառնվելը, այլապես Սասունի անկախությունն ու կայունությունը կվտանգվի³: Արմաղանը խորհրդանշում է Սասնա Մեծ տան կանանց իմաստությունը: Մեծ Միերը Մսրում մնում է 7 տարի, նրանից և Մելիքի կնոջից՝ Իսմիլ խաթունից ծնվում է կրտսեր Մսրա Մելիքը: Յոթ տարի հետո Միերը վերադառնում է հայրենի Սասուն: Վիրավորված Արմաղանին Մեծ տան իշխանները պարտավորեցնում են ընդունել ամուսնուն, քանի որ Սասնա երկրին դյուցազնական ժառանգ էր պետք:

Անդրադառնում ենք «Սասունցի Դավիթ» ճյուղին: Շուտով Մեծ Միերից և Արմաղանից ծնվում է էպոսի գլխավոր դյուցազունը՝ Սասունցի Դավիթը: Դավիթ ծնվելուց կարճ ժամանակ անց Միերն ու իր կինը մահանում են: Սասնա աշխարհում սուգ է բռնվում: Ծանր սգից հետո իշխանական տան առաջնորդները՝ Ձենով Հովանը, Վերգոն, Քեռի Թորոսը, ավագների խորհուրդը հավաքվել ու քննարկել են Դավիթ խնամակալության հարցը: Հորեղբայրներից որևէ մեկը չի ցանկանում ստանձնել փոքրիկ դյուցազնի խնամակալությունը: Երկար քննարկումներից հետո որոշում են նորածնին ուղարկել Իսմիլ խաթունի մոտ՝ համաձայն Մեծ Միերի և Մսրա Մելիքի միջև կնքված ուխտի: Սասունի կառավարումը մնում է Սանասարի մնացած ժառանգների ուսերին, որոնք օժտված չէին դյուցազնական հատկանիշներով և ապիկար էին երկիրն ամուր պահելու հարցում: Տեղին է այստեղ հիշատակել Եղ. Չարենցի նգովքը Սասնա իշխաններին.

**Դառնանք բարբառենք նգովք մենք նախ
Մսրամելիքին, թագավորին,
Դառնանք բարբառենք նգովք ապա
Ձենով Օհանին, իշխանին նենգ
Դառնանք բարբառենք նգովք ապա
Այլ իշխաններին բոլոր այն մեր,
Որ բերին մեզ մահ, ու մուժ, ու նեռ⁴:**

³ Լ. Խեչոյան, Միերի դրան գիրքը, «Անտարես», 2014, էջ 66:

⁴ Եղիշե Չարենց, Երկեր, «Սովետական գրող», 1983, էջ 443:

Դավիթը Մսրրում ապրել է 9 տարի, բայց ազնվականների գավակներին ծեծելու, ավագ եղբոր՝ Մսրա Մելիքի ատելության պատճառով Իսմիլ խաթունն այլևս չէր կարողացել նրա անվտանգությունը պահպանել: Դավթի վերադարձին ողջ Մասնա ժողովուրդը շքախումբ կազմած ընդառաջ է գնացել, միմյանց աչքալուսանք տվել Մեծ տան իշխանական ժառանգի վերադարձի կապակցությամբ՝ ակնկալելով, որ Դավթին Մհերի տեսքով ու պայածառակերպությամբ կտեսնեն: Տեսնելով դաշտով եկող, աջ ու ձախ խոտ պոկոտող տղային՝ սկզբում կասկածել են, թե եկողը Դավթն է: Հիասթափությունից սկզբում պապանձված Ձենով Հովանը՝ իրենց հիասթափությունը ժողովրդից քողարկելով, բարձր կանչել է Քեռի Թորոսին, թե՛ «ճամփից դուրս ծուռ-ծուռ եկող էն տղան, վայ թե ծուռ Դավիթը լինի, մեր ցեղի քայլվածքով է գալիս»⁵: Դավթին դարձնում են նախրապան՝ իշխանական գործերի համար չափազանց միամիտ ու նույնիսկ պակասամիտ համարելով: Դավիթը նախիրի հետ քաղաք է բերում նաև վայրի գազաններին: Դավթի այս քայլը խորհրդանշական է . նա կարողանում էր համակեցություն ու հավասարություն ապահովել թույլերի և ուժեղների, իշխանների և ժողովրդի միջև՝ երկու կողմին էլ ենթարկեցնելով իրեն՝ որպես ի վերուստ նախնիներից դյուցազնական հատկանիշներ ժառանգած առաջնորդի: Դավթի հայրենիք վերադառնալուց հետո Դավիթ-Մսրա Մելիք անձնական հակադրությունն ու թշնամանքը վերածվում է ազգային- հասարակականի: Մասունը հպատակեցնելու փորձեր են սկսվում Մսրա Մելիքի կողմից: Փաստացի երկու արյունակից եղբայրները՝ Դավիթը և Մելիքը, սկսում են պայքարել առաջնորդի իրենց իրավունքը հաստատելու համար: Մելիքը խորհրդանշում է նենգությունն ու չար նախանձը, իսկ Դավիթը՝ անպարտելի քաջությունն ու վտանգավոր միամտությունը: Դավթի այս հատկանիշները մեր ազգային ինքնաճանաչողության գլխավոր բանալիներն են: Պատահական չէ, որ ասացողները Դավթի՝ Մսրա Մելիքից խաբվելու և խոր փոսն ընկնելու հատվածը դառն արտասուքով ու կսկիծով են պատմել բանահավաքներին՝ հստակ իմանալով , որ Դավիթը կարողանում է դուրս գալ փոսից և հաղթել Մելիքին:

**Օ՛, մանուկ Դավիթ դու միամիտ,
Առյուծ Մհերի որդի ռամիկ,
Քո գլխում ինչքա՛ն խաղա քամի,**

**Ահեղ փորձության, մահու ժամին,
Որքա՛ն հավատաս անգետ կամիվ
Ամեն մի ոտխ ու թշնամի
Մսրամելիքի ու Օհանի...**

⁵ Լևոն Խեչոյան, Մհերի դռան գիրքը, «Անտարես», 2004 , էջ 75:

**Եվ մանուկ Դավիթն, արդար ու մեղմ,
Հավատաց չարին ու մտավ ներս,
Եվ ընկավ՝ խաբված դավով այն նենգ,
Մելիքի փորած անդունդի մեջ ...⁶**

Հատուկ անդրադառնում ենք նաև Դավթի և Չմշկիկ Սուլթանի անօրինական կապին, նրանցից ծնված Հրանուշ անունով աղջկան, որը հետագայում սպանում է հորը: Մասնա հզոր դյուցազունը, որ անպարտելի էր բոլոր թշնամիների համար, կործանվում է իր իսկ սերմի ապօրինի զեղումից: Այստեղ հատկանշական է շեշտել, որ էպոսի այսպիսի զարգացումը պատահական չէ: Որպես հավաքական ամբողջություն, հայ ժողովուրդն իմաստուն է. էպոսի իր ամենասիրված ու քաջ դյուցազնի կործանումն այդպես հյուսելով՝ ժողովուրդը հստակ գիտակցել է և շեշտադրել, որ մեր կորուստը մեզնից է, ինչպես Դավիթն է ասում՝ «Իմ ցեցն ինձնից է»: Անդրադառնում ենք վերջին ճյուղին «Փոքր Մհեր» ճյուղի բովանդակությունն ամփոփելուց հետո սովորողներն առանձնակի բազմակողմանիությամբ դիտարկում են Մհերի կերպարը, համամարդկային գաղափարները, անմահ, բայց անժառանգ լինելու պատճառները, Մհերի ստանձնած առաքելությունը: Մասնա հզոր դյուցազուն Դավթից ծնվում է Փոքր Մհերը: Նորածին դյուցազնի փակ բռունցքը բացվում է միայն Քեռի Թորոսի երկար ջանքերից ու աղոթքներից հետո: Բռունցքի մեջ պինդ պահած մի պուտ արյունը տեսնելով՝ Քեռի Թորոսը մարգարեաբար ասում է , որ թե քարն այս տղային ներս առավ՝ ներս առավ, այլապես հողն ի գորու չի լինի Մհերին իր վրա պահել: Մի կաթիլ արյան տեսքով փոքրիկ դյուցազնը աշխարհն է բռունցքի մեջ պահում: Մհերը քաջ է ու անվախ, ինչպես իր նախնիները: Բայց նա իր ժողովրդի կողմից ամենաչհասկացված կերպարն է: Դավիթն ըստ էության ոչ թե անիծում է որդուն՝ անմահ ու անժառանգ լինել, այլ գերբնական հայրական զգացումով մարգարեանում է: Մարդկությունից ու աշխարհի անարդարությունից դժգոհ Մհերը հրաժարվում է Մասնա իշխանական Մեծ տան գահից և կամովին փակվում է Ագռավաքարում: Ագռավաքարը խորհրդանշում է բնության արգանդը, որտեղ իր ծնունդին է սպասում նոր աշխարհի խորհրդանշական կրողը՝ Փոքր Մհերը:

«Մասնա ծոերի» ուսուցման ընթացքում սովորողները քննարկում և գնահատական են տալիս նաև ոչ առանցքային կերպարներին՝ ժողովրդի իմաստնությունը խորհրդանշող Քեռի Թորոսին, Արտատեր Պառավին, Մեծ տան կանանց: Առանձնակի դիտարկվում է նաև ջրի պաշտամունքը: Ջրից է գորեղանում ու գերբնական ուժ ստանում Սանասարը: Ջրից է Սանասարը դուրս հանում ու իր ժառանգներին սերնդեսերունդ փոխանցում Քուռկիկ Ջալալին և Թուր Կեծակին: Մեծ Մհերը կովից առաջ լողանում է Կաթնաղբյուրում, խմում այդ ջրից և գորեղանում: Որոշակի անդրադարձ է կատարվում նաև կրոնական գաղափարներին: Էպոսում չկա

⁶ Եղիշե Չարենց, Երկեր, / Սովետական գրող 1983/ էջ 460:

կրոնական շեշտադրում, բայց առկա են հեթանոսական և քրիստոնեական ծիսական նկարագրություններ: Էպոսի հերոսները պաշոպանում են իրենց հավատը, բայց նրանք անտարբեր են կրոնի հանդեպ: Եվ հենց այդ իմաստով էլ նրանց համար կրոնն ու հավատը հավասարազոր չեն:

ԳԼՈՒԽ 2.

Դյուցագներգությունը, որպես ժողովրդի կողմից հյուսված վիպերգ, համակողմանի ուսումնասիրելու դեպքում տալիս է մեզ ազգային ինքնաճանաչողության բանալիները: Էպոսի դյուցագուններից յուրաքանչյուրին բնորոշ առանձնահատկությունները բնութագրում է հայ ժողովրդին:

Սանասարն ու Բաղդասարը ահռելի ջանքերով կառուցում են իրենց բնօրրանը, բայց անուն ընտրելու համար մի ծերունու են դիմում և այդ ծերունու «Սա սյուն է» արտահայտությամբ են անվանում Սասունի անունը, ինչը բնորոշում է մեր դյուցագունների հասարակ ու մեծամտությունից զուրկ լինելը, մեծերի իմաստնությանն ապավինելը:

Մեծ Մհերը քաղաքական գործչին և առաջնորդին բնորոշող դյուցագուն է: Նա իր պարտքն է համարում ժողովրդի խաղաղ ու բարեկեցիկ կյանքն ապահովելը: Իր նախնիներից ժառանգած երկիրը պաշտպանելն իր պատվի և արժանապատվության հարցն է համարում: Մեծ Մհերին բնորոշող առանձնահատկություն է նաև իր խոսքը պահելը, որպես տղամարդ տված խոստումին հավատարիմ մնալը:

Սասունցի Դավիթն իր «ծռությամբ» և աններելի միամտությամբ երբեմն թերահավատություն է ներշնչում իր նկատմամբ, բայց նա օժտված է ասպետական քաջությամբ: Էպոսի ամենասիրված ու առանցքային կերպարն է, քանի որ Դավիթը տիպիկ մարմնավորումն է հայ ժողովրդին բնորոշ բոլոր հատկանիշների: Որպես առաջնորդ նա վտանգավորության աստիճան միամիտ է, դիվանագիտությունից զուրկ, ոչ խորատես: Փոխարենը նա անասելի անվախ է, քաջ ու հզոր, օժտված է վեհանձնական բարությամբ, հայրենի սահմանները պահպանելու մեծ պատասխանատվությամբ:

Փոքր Մհերը էպոսի ամենախորհրդանշական կերպարն է: Նա փակվել է Ագռավաքարում, որ ըստ հին քուրմերի բնության արգանդն է խորհրդանշում, որտեղից Մհերը դուրս է գալու հին ու անարդար աշխարհի փլուզման և նոր, չարատավորված աշխարհի վերստեղծման հետ: Փոքր Մհերը համամարդկային արժեքների կրողն է:

Մսրա Մելիքի կերպարը մարմնավորում է հայ ժողովրդի թշնամիներին: Պատահական չէ, որ հայ ժողովուրդն իր էպոսը հյուսելիս իր թշնամուն ստեղծել է իր իսկ արյունից: Սա էպոսի գաղտնագրված բանալիներից է, որ մեզ տանում է դեպի ինքնաճանաչողություն, առ այն, որ մե՛նք ինքներս ենք մեր թշնամին, որ մեզ միայն մենք կարող ենք կործանել: Ինչպես Դավիթն է ասում՝ «Իմ ցեցն ինձնից է»:

ԵԶՐԱԿԱՑՈՒԹՅՈՒՆ

Ուսումնասիրելով ազգային էպոսի ուսուցման առանձնահատկությունները՝ հանգեցինք այն եզրակացության, որ «Սանա ծոեր» էպոսը դեռ տևական ուսումնասիրության կարիք ունի: Դրանում արծարծված գաղափարները վերժամանակյա են՝ արժանի համակողմանի քննության: Հաշվի առնելով միջին դպրոցի սովորողների կարողությունները՝ էպոսի ծավալն իր ողջ բազմաշերտությամբ չենք կարող ուսուցանել, բայց պարտավոր ենք ամբողջական գաղափար տալ վեպում թաքնված գաղտնագրերի, ինքնաճանաչողության, հայրենասիրության, մարդկային և ազգային արժեքների մասին:

Օգտագործված գրականության ցանկ

1. Լիլիթ Հովսեփյան, Էպոսի տասը ընտիր պատումները
2. Լևոն Խեչոյան, Մհերի դռան գիրքը
3. Եղիշե Չարենց, Սասունցի Դավիթը
4. Մանուկ Աբեղյան, Սասունցի Դավիթ
5. Աելիտա Դոլուխանյան, Հայ գրականության դասավանդման մեթոդիկա
6. Հ. Կոչոյան, Ս. Հարությունյան, Սասունցի Դավիթ